

光緒吉林通志

吉林通志卷十一

沿革志中

遼爲上京之東南東京之東北及女眞五國等部地

上京道長春州

今農安縣北

遼史地理志一長春州韶陽軍下節度本鴨子河春獵之地興宗重熙八年置隸延慶宮兵事屬東北統軍司統縣一長春縣本混同江地

契丹國志二十一長春路鎮撫女眞室韋置黃龍府都部署司咸州兵馬詳穩司東北路都統軍司

北邊紀事長春州亦曰長春路去女眞最近邊人亦

謂之新泰州

方輿紀要十八引

遼史營衛志中春巴納

舊作納鉢滿洲語巴納地方也蓋指游獵之地而言

鴨子河濼東西二十里南北三十里在長春州東北

三十五里四面皆沙塢多榆柳杏林

按遼史本紀載

改鴨子河爲混同江塔魯河爲長春河然又屢以鴨子混同二水並稱據契丹國志則鴨子卽塔魯河今洮爾河也國志又云太宗破晉改粟末河爲混同江史志傳說未有確據

謹案滿洲源流考云遼上京臨潢府在今巴林阿

嚕科爾沁札嚕特等地惟長春一州濱混同江今

杜爾伯特札賚特皆州之北境則遼長春州當與

今伯都訥相近又通鑑輯覽注長春州今郭爾羅

斯地考郭爾羅斯正與伯都訥相近又光緒十五年以郭爾羅斯地爲農安縣故知遼長春州惟在今農安縣無疑也

東京道通州

今長春府東北朱家城子境

遼史地理志二通州安遼軍節度本扶餘國王城渤海號扶餘城太祖改龍州聖宗更今名保甯七年以黃龍府叛人雅爾丕勒原作燕頗餘黨千餘戶置升節度統縣四通遼縣本渤海扶餘縣併布多縣置安遼縣本渤海顯義縣併鵲川縣置歸仁縣本渤海強師縣併新安縣置漁谷縣本渤海縣

賓州

今農安縣東南瀕江處

又賓州懷化軍節度本渤海城統和十七年遷烏舍

原作兀惹

戶置刺史於鴨子混同二水之間後升兵事隸

黃龍府都部署司

松漠紀聞翁舍展

舊作盟熱者

國不知其始所居後爲契

丹徙置黃龍府南百餘里曰賓州州近混同江卽古之粟末河也部落雜處以其族之長爲千戶統之

謹按契丹國志引此文作混同江卽古之粟末河黑水也多黑水二字蓋宋以前人皆以松花江北流者爲粟末水至伯都訥折而東流者爲黑龍江

合稱曰混同江據國志之文州當在伯都訥據遼  
史鴨子混同二水之間當在伯都訥北據松漠紀  
聞之文當在農安縣東南瀕江處準之地望紀聞  
爲確今從之

龍州黃龍府

今長春府境

遼史地理志二龍州黃龍府本渤海扶餘府太祖平  
渤海還至此崩有黃龍見更名保寧七年軍將雅爾  
丕勒叛府廢開泰九年遷城於東北以宗州檀州漢  
戶一千復置統州五縣三黃龍縣本渤海長平縣併  
富利佐慕肅慎置遷民縣本渤海永寧縣併豐水扶

羅置永平縣渤海置

又本紀三太祖所崩行宮在扶餘城西南兩河之間  
後建昇天殿於此而以扶餘爲黃龍府

謹按黃龍府本渤海扶餘府與通州爲渤海扶餘  
城者似屬一處但通州所屬有扶餘等縣乃扶餘  
府舊縣黃龍府所屬之富利長平乃渤海龍州舊  
縣以史文測之蓋太祖旣破龍州遷其民於扶餘  
府東北境亦設龍州如南朝僑郡故通州先名龍  
州又改扶餘府爲黃龍府屬龍州故黃龍府冠以  
龍州也及遷黃龍府於東北乃初設龍州之地故

府所屬反係龍州舊縣而通州自保寧置於扶餘  
舊城故所屬皆扶餘舊縣也

元一統志賓州之西曰黃龍府卽石晉出帝初安置  
之地滿洲源流考十一引

遼史營衛志下烏延原作突厥部聖宗析四布沙原作

闕沙四巴拜原作戶置以鎮東北女直之境屬黃龍府

都部署司

又阿雅原作突厥部與烏延突厥同

北唐古部聖宗以唐古戶置屬黃龍府都部署司戍

府南



益州

今農安縣東

〔又地理志〕益州觀察屬黃龍府統縣一靜遠縣

安遠州

〔又安遠州懷義軍刺史屬黃龍府

威州

今農安縣西南

〔又威州武甯軍刺史屬黃龍府

清州

〔又清州建甯軍屬黃龍府

雍州

〔又雍州刺史屬黃龍府

湖州

又湖州興利軍刺史渤海置兵事隸東京統軍司統縣一長慶縣

渤海

又渤海清化軍刺史渤海置兵事隸東京統軍司統縣一貢珍縣渤海置

謹按湖渤二州渤海所置在今甯古塔境遼未得其地蓋用其舊名置於黃龍府境故志文與龍州相次其兵事則屬東京當在今長春府之西北

涑州

今打牲  
烏拉

又涑州刺史渤海置兵事隸南女直兵馬司

率賓府

今伊通州境

又率賓府刺史故率賓國地

謹按遼境僅及松花左右率賓在甯古塔東南已入渤海女真境非羈縻卽僞置耳源流考云遼率賓在涑州定理之間近之

濌州

今農安縣西南

又濌州昌永軍刺史

張棣金圖經威州至小寺鋪五十里小寺至勝州五

十里

雲麓漫鈔信州彰聖館七十里至勝州來德館

謹按滿洲源流考史不載沿革當爲廢戶所置按此州與黃龍府相次以宋人行程錄證之當係勝州之謫

甯江州

今伯都訥城東南石頭城子

遼史地理志二甯江州混同軍觀察清甯中置初防禦後升兵事屬東北統軍司統縣一混同縣

通鑑輯覽注甯

江故城在今吉林烏喇北混同江東

謹按金之破遼首得甯江今得勝陀碑正在石頭城北是爲此州確證

祥州

今長春府東北

又祥州瑞聖軍節度與宗以鐵驪戶置兵事屬黃龍府都部署司統縣一懷德縣

元一統志廢祥州在賓州西南

謹按遼時於東北邊旣設都統軍司又設黃龍府都部署司又以所屬部族如圖魯卜室韋納喇諾觀等部星羅碁布築城堡運糧草撥兵甲蓋深知女直之雄鷲所以防範者周且備矣乃傳梃一呼鐵騎頓起一戰而甯江失再戰而黃龍失不一三年而咸祥五十餘城相繼並失豈始謀之不善也

女眞秣馬厲兵蓄志已非一日遼顧狃於積習泄  
沓相仍夫法貴因時以制宜積久無不懈也識時  
務者爲俊傑庸人罔不敗也契丹國志言遼國舊  
制凡關軍國大事漢人不預天祚自兩敗之後始  
思更張乃所用又不得其人五箇翁翁庸庸才耳  
天下大計屬於此曹豈有不敗者哉

遼史營衛志下遼國外十部其三曰回跋即輝部其

九其十曰長白山部蒲盧毛朵部右不能成國附庸  
於遼時叛時服各有職貢猶唐人之有羈縻州也

輝發

舊作回跋部今伊通  
又作回霸部州東南

大金國志二十六自咸州東北分界入山谷至涑沫

江

按涑沫卽混同而志並稱蓋誤混同爲黑龍江也

中間所居之女真隸咸

州兵馬司謂之輝發

按咸州在今威遠英莪門之間東北至松花江約六七百里今

有輝發河

長白山部

今吉林府東南

博羅滿達勒

舊作蒲部今琿盧毛朵部春境

謹按遼史博羅滿達勒部內多有烏舍民當與烏

舍相近博羅滿達勒界有海蘭河又進船工則此

部應在今琿春以西長白山北海蘭河許

遼史兵衛志下遼屬國可紀者五十有九朝貢無常

有事則遣使徵兵或下詔專征不從者討之助軍眾

寡各從其便無常額鐵驪靺鞨兀惹北女直輝發回

跋女直皆不輕用之所以長世

遼史

女真部

今阿勒楚喀  
甯古塔境

契丹國志二十六女真世居混同江之東山其地乃

肅慎故區也地方數千里戶口萬餘無大君長立首

領分主部落地饒山林契丹於長春路置東北統軍

司黃龍府置兵馬都部署司咸州置詳袞

舊作詳穩

司分

隸之

又二十二東北至生女真國西南至熟女真國界東



至新羅國東北不知其極屢爲邊患契丹亦設防備  
南北二千餘里南界西南至東京六百里

北盟彙編二女真古肅慎國也本名珠里真番語訛  
爲女真或以爲黑水靺鞨之種而渤海之別族有七  
十二部落無大君長極遠而近東海者謂之東海女  
真多黃髮鬢皆黃眼睛綠者謂之黃頭女真

文獻通考四裔考女真蓋古肅慎氏世居混同江之  
東長白山下鴨綠水之源南隣高麗北接室韋西界  
渤海鐵甸東瀕海後漢謂之挹婁元魏謂之勿吉隋  
唐謂之靺鞨姓挐氏隋開皇時曾入貢其族分六部

有黑水部卽今女真其水掬之則色微黑目爲混同

江卽松花江下流唐貞觀中靺鞨來朝太宗問其風

與黑龍江合流

俗因言及女真之事自是中國始聞其名契丹目之

曰慮眞五代時始稱女眞後避契丹主宗眞諱更爲  
女直俗訛爲女質阿保機吞北方三十六蕃此其一

也阿保機慮其爲患誘遷豪右數千家於遼陽而著  
籍焉分其勢使不得與本國相通謂之合蘇館合蘇  
館者熟女眞也又曰黃頭女眞自咸州東北分界入  
谷口至涑沫江中間所居者以隸咸州兵馬司與其  
國往來無禁謂之回霸回霸者非熟女眞亦非生女

眞也自涑沫江之北甯江之東地方千餘里戶十餘萬無大君長亦無國名自推豪俠爲酋渠小者千戶大者數千戶則謂之生女眞僻處契丹東北隅

謹按黑水阻山負海風氣樸實其人勇敢善戰得之則興蓋所謂起事之地也女直來自高麗據爲已有即使遼思患預防尙恐不足以制乃舉關河天險棄之若遺豈非謀之不臧以至此乎

烏舍舊作部今三  
烏惹部姓境

契丹國志二十二又東北至屋惹國阿里瑪舊作阿  
里眉

國布庫哩舊作破  
骨魯國等國每國各一萬餘戶西南至

生女眞界西南至上京四千餘里

鐵驪國

今三姓東北

契丹國志二十二正東北至鐵離國南至阿里眉等國界西南至上京五千餘里

遼金紀事海東青出於女眞東北鐵甸等五國

陷虜記距契丹東至於海有鐵甸其族野居皮帳

五代

史記

引

靺鞨部

今甯古塔東境

契丹國志二十二又東北至靺鞨國東北至鐵離國爲界西南至上京五千餘里

謹按靺鞨當卽渤海之遺蓋自忽汗破後不復成國避處東偏仍其靺鞨舊號由是而女眞强矣

五國部

今三姓富克錦境

遼史地理志二五國部聖宗時來附命居本土以鎮東北境屬黃龍府都部署司

北盟彙編三五國之東接大海出海東青女眞每發甲兵千餘人入五國界卽東海巢穴取之與五國戰鬪而後得

明一統志八十二五國頭城在三萬衛北一千里自此而東分爲五國舊傳宋徽宗葬於此

博和哩國

舊作阿里

博諾國

舊作盆奴里又作蒲奴里史又改作富珠里

鄂羅木國

舊作奧里米

伊呀圖國

舊作越里篤

伊呀濟國

舊作越里奴史改作鐵驪又改作伊勒希

文獻通考四裔四女真外有五國曰鐵勒曰噴訥曰

玩突曰怕忽曰咬里没皆與接境自天聖没後屬契

丹不復入貢

文獻通考

謹按魏源云三姓城在甯古塔東北五國城在焉

卽肅慎故墟然史云自頭城以東分爲五國則非

一地可知且其名亦不一除博和哩五部外又有  
威烏爾古穆延部至伊喀濟又作鐵驪然考之遼  
營衛志屬國表威烏爾古鐵驪通鑑輯覽又以自  
爲奚部族號  
是別部不在五國部內也其地據朔方備乘圖在  
混同江北烏蘇里江入混同江之西北云

伯哩舊作婆離部今烏蘇里江入  
又作頗里部混同江東岸

謹按唐以倪屬利稽爲勃利州刺史以方隅音譯  
考之當卽遼之伯哩

達嚕噶舊作達魯號金史作達魯  
古通鑑輯覽作達羅克部今伯  
都訥

遼史營衛志下珠展原作達嚕噶部聖宗以達嚕噶  
尤哲

戶置隸北府節度使屬東北路統軍司戍境內居境  
外

謹按金史太祖復達嚕噶部色爾袞曰與汝隣境  
又率兵趨達嚕噶城次甯江州西以地勢測之當  
爲今伯都訥境

### 定安國

謹按文獻通考宋開寶三年定安國遣史上表言  
本高麗舊壤渤海遺黎考高麗舊壤以唐時言之  
自今朝鮮之西偏及奉天遼河以東其北境直至  
松花江左右但至宋時鴨綠松花兩江以西均爲



遼之郡縣

大遼事跡東京至鴨綠西北峯為界

長白山北為三十部

女真境吉林以北為涑州甯江州境此定安一國

當在今吉林西南磨盤山許

### 完顏部

謹按金史世紀一有特克新特布

原作泰紳或保

水完顏

部舍音

原作神隱

水完顏部列傳

六十

有音德爾

原作雅達

蘭

水完顏部

六十

有瑪奇嶺赫伯村完顏部

七十

有扎蘭路完顏部埒克傳云完顏部十二則金始

祖所居蓋海古勒完顏部其舍音水為今三音訥

殷地扎蘭元作耶懶蓋即今琿春以東入海之雅

蘭河所謂耶懶率賓相去千里與今綏芬河里到  
正自相符也

富察

原作蒲察部

謹按金埒克傳富察部之黨七部爲一世紀有富

察部又有鄂敏

原作幹敏

水富察部按

盛京通志額爾敏河其北爲富察之野額爾敏河卽鄂  
敏水則富察部應在今伊通州境又考實嘉努傳  
富察部人世居阿勒楚喀水則富察又當在今賓  
州廳地蓋亦如完顏部之比所居非一地也

博都哩

原作尤魯部

謹按金世紀和諾克之變博都哩部富察部助之

其地當與富察部近

費摩

原作裴滿部

謹按金世紀和諾克來攻過費摩部列傳

六十有五

摩多圖

原作波多吐

水費摩部其部與富察隣摩多圖

音與索多庫近當在今五常廳境

瓜爾佳

原作加古部

謹按金世紀有瓜爾佳部列傳

六十

又有和倫

原作

胡論水瓜爾佳部和倫卽今霍倫川在五常廳境

珠嘉部

珠格部

謹按金史六十五德濟呼遜皆珠嘉部貝勒雙寬  
主保皆珠格部人烏春傳涉和掄拉林水舍於珠  
格部阿勒哈村以地望診之二部當在今五常廳  
境

烏蘇展

原作烏薩扎部

謹按列傳

六十

拉林水烏蘇展部當在今五常雙

城廳境

烏凌阿

原作烏林苔部

謹按金世紀鄰部海蘭水烏凌阿部人尙拒阻不

服此海蘭當是甯古塔西境之海蘭也

溫都部

謹按金烏春傳阿卜薩

原作阿跋斯

水溫都部人又自

稱呼爾哈與女直豈可爲親又稱拉林水以南布克坦水以北皆吾土也其地當在甯古塔西境

烏雅部

謹按金列傳六十五和掄瓜爾佳部察遜

原作蟬春水

烏雅部畏烏春強請出兵其間以爲重烏春傳二

部與烏春近

溫特赫

原作溫迪痕部

謹按金世紀有圖們水溫特赫部又德克德傳和  
倫水溫特赫部人其地一當在琿春界一在五常  
界

齊達勒

原作直里部

沃稜

原作兀勒部

謹按金博勒和傳齊達勒部嘗寇扎蘭路博勒和  
討之至阿里瑪河又沃稜部掠二十五寨復討之  
渡索歡河至特通額水至德里城考阿里瑪河當  
卽阿穆蘭河德里城當卽德林石地此二部應在  
三姓甯古塔間

鴻觀

原作舍國部

威準

原作幹准部

哲爾德

原作職德部

謹按金威泰傳蘇伯水諸部不聽命使威泰至呼爾哈川召諸部惟鴻觀部不至威準部亦皆遯去遇烏塔於瑪奇嶺又通恩傳威準部侵及赫舍哩部伊喇行至蘇伯水遂攻烏庫哩部蓋此三部當在琿春敦化之交

赫舍哩

原作石烈紇部

謹按金世紀有錫驛

原作星顯

水赫舍哩部屯

原作陶溫水

圖嚕庫

原作徒籠古

水赫舍哩部列傳七十有哈勒琿

原作活刺渾

水赫舍哩部阿爾本特克新水赫舍哩部

其地當在長白山北

烏庫哩

原作烏部古論

謹按金世紀云圖們琿春之交烏庫哩部與蘇伯水烏庫哩蓋二部也埒克傳烏庫哩之黨十四部

爲一

烏遜部

烏塔部

謹按金埒克傳烏庫哩部人間誘烏遜烏塔兩部



爲亂蓋烏庫哩之黨也

達魯特部

圖吉

原作部  
突鞠部

謹按金本紀三烏庫哩達魯特兩部來降實古納  
傳烏庫哩部人迪里華沙率部人降以華沙知達  
魯特部事達勒達知圖吉部事蓋二部亦烏庫哩  
之黨也

圖克坦部

謹按金塔克傳圖克坦部之黨十四部爲一阿蘇  
傳錫馨水赫舍哩部人嘗與圖克坦部爭長其部

當與錫馨水近

托卜古論

原作土部  
骨論

謹按金世紀自白山頁赫圖們托卜古論之屬以  
至五國之長皆聽命又東南至於伊勒呼海蘭扎  
蘭托卜古倫考圖們有烏庫哩溫特赫二部伊勒  
呼有布薩部海蘭有烏凌阿部扎蘭有完顏部獨  
托卜古論僅見蓋東南小部也

布薩部

謹按金史高麗傳伊勒呼嶺布薩部居高麗女直  
之間

沃喀

原作  
幹勒部

謹按金罕都傳沃喀部人博諾居按春水之北

尼瑪哈

原作泥  
驅古部

謹按金世紀太祖伐尼瑪部刷水穆哩罕村刷水

今蘇瓦延地也

矩威

原作  
燭隈水部

謹按金世紀令矩威圖塔兩水之民阻絕騰路又

稱東北至於五國矩威圖塔布古德傳與綽哈招

降矩威水部又往拜格河籍軍馬矩威水部殺綽

哈後幹魯伐之於希爾根河追及於哈達拉山

布古德

原作鼈故德部

謹按金世紀穆宗嘗使布古德部致言於遼蓋亦

鄰部又本紀綽哈撫定成默

原作讒謀

水女直拜格

原作

古鼈酋長似拜格卽布古德又布古德傳綽哈往拜格河矩威水部殺之其部當與矩威水近

納哈塔部

謹按金罕都傳頁赫部納哈塔部安扎與人爭部

族官遂來歸頁赫卽今葉赫在遼時當屬率賓路

及通州境蓋熟女真也

伊勒敦部

謹按金紀大定十七年咸平府路一千六百餘戶  
自陳皆長白山錫馨珊沁河女真遼時僉爲獵戶  
移居於此號伊勒敦部其地當在今伊通州境

阿克占

原作  
阿典部

謹按金世紀哈里叛入於係案女真阿克占部

錫默部

謹按金赫木頗傳珠卜奇

原作  
水錫默部人

謹按金史紀傳尙有烏瑄部薩里罕部烏古德塔  
勒部以地望測之均已入於黑龍江省又有伊蘭  
路幹瑄路集賽路安圖路珊沁路錫馨路二額納

斯琿路二恩楚路博齊赫布騰路伊騰路伊罕路  
伊克路尼瑪蘭路蓋皆當時部族之散處者

謹按吉林在遼時設郡縣者南自伊通北抵雙城  
堡僅西鄙耳洮州卽今吉林府境然金破遼時只  
咸平甯江賓州扶餘而洮州無聞蓋已入於女眞  
女眞及各部族甚夥遼史未著今據金史錄其可  
考者

金爲上京海蘭率賓呼爾哈等路及咸平路泰州境  
上京路

金史地理志上上京路卽海古勒之地金之舊土也

國言金曰愛新以按春水源於此

舊作按  
出虎

故名金源

國號蓋取諸此國初稱爲內地天眷元年號上京海

陵遷都於燕削上京之號止稱會甯府大定十三年

復爲上京其山有長白青嶺瑪奇嶺

舊作  
馬紀

溫都爾

原作

完都  
魯

水有阿勒楚喀混同拉林松阿哩鴨子河府一

領節鎮四防禦一刺郡一

三字據廿二  
史考異增

縣六鎮二舊

有會平州天會二年築契丹之珠敦

舊作  
周特

城也後廢

其宮室有乾元殿慶元宮朝殿涼殿行宮有天開殿

約羅春水之地有混同江行宮興聖宮永祚宮光興

宮有皇武殿有雲錦亭有臨漪亭

契丹國志三十三女眞世居長白山之東南鄰高麗  
北接室韋西界渤海東瀕海國初城郭散居呼曰皇  
帝寨國相寨太子莊後升曰會甯府建爲上京城邑  
宮室無異中原州縣廨宇制度草創

謹按上京之稱不一其地有渤海之上京有遼之  
上京有金之上京宋元人記載往往誤認岳珂程  
史記趙良嗣使女眞隨軍攻遼上京其文甚明乃  
云上京今虜會甯也此誤以遼上京爲金上京也  
元一統志云金滅遼設都於渤海上京此又誤以  
渤海上京爲金上京也元一統志之文見於明一



統志所引扈從東巡日錄甯古塔紀略皆承其誤而後之修志者因之此皆失之不考柳邊紀略既知以古行程測度乃謂在塞齊窩集左右

盛京通志取之且謂塞齊窩集嶺上有故城址相傳爲金時闕門今張廣才嶺卽塞齊窩集綿亘數百里嶺上絕無城基則其說尤不足據考洪皓松漠紀聞自上京一百五十里至拉林河又百十里渡混同江此自東而西道里也許亢宗奉使行程錄過混同江百二十五里至拉林河百七十里至北庭張棣金圖經自混同江至來流河百里又百五十

里至上京此自西而東道里也雖里數少有參差而大較相去不遠與今日自拉林河至阿勒楚喀之白城道里皆合是白城爲金上京確無疑義若甯古塔之距拉林則相去五六百里矣

會甯府

今阿勒楚喀

**金史地理志上**會甯府下初爲會甯州太宗以建都

升爲府天眷元年置上京留守司以留守帶本府尹

兼本路兵馬都總管後置上京海蘭等路提刑司東

至呼爾哈

原作胡里改

路六百三十里西至肇州五百五

十里北至扶餘路七百里東南至率賓路

原作恤品

一千

六百里至海蘭路一千八百里縣三會甯縣倚與府

同時置有長白山青嶺瑪奇嶺巴延

原作勃野

淀綠野淀

有按春河又書作阿朮泮有混同江拉林河有得勝

陀國言額特赫格們

原作忽土  
皚葛蠻

太祖誓師之地也曲

江縣初名鎮東大定七年置十二年更今名宜春縣

大定七年置有鴨子河

謹按會甯爲上京所治金史記其方隅里到所載

獨詳其云東至呼爾哈則今三姓地也西至肇州

則今伯都訥地也東南至率賓路則今綏芬河地

海蘭路則今大小海蘭河地也由各處至阿勒楚

喀核以今之里到無不相符是上京會甯府之在  
阿勒楚喀境毫無疑義而元統志乃云金滅遼卽  
渤海上京建邦設都渤海上京爲今甯古塔地核  
其四至不特里到全非卽方隅亦無一相合顧或  
謂天眷以前嘗以甯古塔爲上京後乃遷於海古  
舊地則考之金史世紀全無其文元一統志今不  
可見見於明一統志所引者訛誤相仍不可枚舉  
此條亦不無誤認不必曲爲之說也府之北境至  
扶餘路蓋今黑龍江地而其直南則史無明文考  
禮志爲希尹立廟於上京那爾琿莊那爾琿今在

吉林南三百里許則上京南境亦千里而遙矣幅  
員亦廣矣哉惟隸府三縣會甯爲倚郭其曲江宜  
春兩縣今不可考李氏兆洛謂曲江在甯古塔境  
理或有之謂宜春在開原東北則兩縣相去一千  
四百里而遙恐萬無此理且開原之地自屬咸平  
亦非上京境域所能到其誤不待辨也

肇州

今伯都訥地

**金史地理志上**肇州下防禦使舊珠赫店

舊作出河店也

天會八年以太祖兵勝遼肇基王迹於此遂建爲州  
天眷元年置防禦使隸會甯府海陵時嘗爲濟州支

郡承安三年復以爲太祖神武隆興之地升爲節鎮  
軍名武興五年置漕運司以提舉兼州事後廢軍貞  
祐三年復升爲武興軍節鎮置招討司以使兼州事  
縣一始興縣倚與州同時置有鴨子河黑龍江

元一統志上京之北曰肇州治始興縣金皇統三年

置

滿洲源流考十三引  
置州年號與金史異

按

謹按元一統志謂上京之北曰肇州則應在混同  
江北岸爲黑龍江呼蘭廡地與史所云上京西至  
肇州五百五十里之文顯然違異不足據依考本  
紀遼都統蕭嘉里將步騎十萬會於鴨子河北太

祖自將擊之及河遼兵方壞陵道遣壯士擊走之  
遂登岸與敵遇於出河店出河店亦名珠赫店今  
遜扎堡站東北十餘里珠赫城俗呼朱家城子金  
之肇州也則是太祖所渡爲伯都訥以南之松花  
江正在阿勒楚喀西五百里許與史文合知肇州  
不得在上京北也又紇石烈德傳云鴨子河去州  
五里是距混同江不遠之徵若一統志云伯都訥  
城東南阿勒楚喀河西岸拉林河之東有肇州遺  
址則方隅里到無一合者蒙古游牧記取之其誤  
甚矣

隆州

今長春府農安縣

金史地理志上隆州下利涉軍節度使古扶餘之地遼太祖時有黃龍見遂名黃龍府天眷三年改爲濟州以太祖來攻城時大軍徑涉不假舟楫之祥也置利涉軍天德二年置上京路都轉運司四年改爲濟州路轉運司大定二十九年嫌與山東路濟州同更今名貞祐初升爲隆安府亦作龍安見富察伊喇傳縣一利涉縣倚與州同時置有混同江拉林河鎮一與縣同時置有混同館

謹按渤海扶餘遼爲黃龍府金天眷中改爲濟州



大定中更爲隆州貞祐初升隆安府此歷代沿革之迹也考公莫紀聞過混同江七十里至北易州五十里至濟州東鋪二十里至濟州此自北而南道里也資治通鑑注云隆州北至混同江一百三十里此自南而北道里也雖小有同異而無大差殊覈以今日由遜扎堡站渡混同江至農安縣里到一一符合知隆州之即農安毫無疑義顧或謂在開元縣境柳邊紀略謂在石頭河雙陽河之間蒙古游牧記謂在昌圖府西北赫爾蘇河北岸皆涉影響不足據依又全遼志言龍安城在一禿河

西岸一禿卽伊通同聲字册說城周七里門四旁有塔亦名農安今農安縣治正在伊通河西二里城基與塔皆與册符知農安龍安皆隆安轉寫之訛實非有兩地也史言隆州有納爾琿河河爲伯都納舊名在金爲肇州嘗爲濟州支郡故以屬之是亦肇州爲伯都訥之一證若禮志別有上京納爾琿河與此自係兩地乃或合而一之非也又按史所云更今名者更濟州爲隆州也貞祐爲宣宗紀年自屬下讀高士奇乃云大定三年更名貞祐則其誤甚矣

海蘭路

今瑯春境

又海蘭路置總管府貞元元年改總管爲尹仍兼本  
路兵馬都總管承安三年設兵司副總管有伊勒呼  
水西北至上京一千八百里東南至高麗界五百里  
謹按滿洲源流考云海蘭河不一與高麗相近有  
安巴海蘭必喇阿濟格海蘭必喇在甯古塔城南  
四百一十里按今爲瑯春境合流入佈爾哈圖河以達噶  
哈哩河今呼十三道嘎雅河又甯古塔城西北二百里有海  
蘭窩集綿互數百里別有海蘭河出焉東流入呼  
爾哈河則元時海蘭路碩達勒達路明時海蘭衛

所在與金時海蘭路之南近高麗者似非一處則  
自海蘭窩集延袤至大小海蘭河其皆金時海蘭  
路境今案源流考謂金元海蘭路不在一處是也  
謂海蘭窩集亦爲金時海蘭路境非也此自確然  
兩地不容牽混考史云海蘭路東南至高麗五百  
里考今由琿春界內之大小海蘭河南行渡徒門  
江至高麗之咸境道里數正同是今海蘭河地之  
爲金海蘭路實確鑿可據金史高麗傳所謂曷懶  
路以南者也曷懶卽海蘭也世紀及高麗傳皆云  
高麗出兵海蘭甸築九城康宗伐之高麗復請罷

九城之戍皆在今海蘭河許而或以今鳳凰城南  
之九連城當之實爲附會康宗時未嘗用兵於遼  
金之壤地未能極於西南之境也至收國元年太  
祖已克黃龍府命撒喝攻保州乃至鴨綠江以西  
耳故知此九城自屬海蘭路也元海蘭路爲今甯  
古塔以北地別見後條

率賓路

今琿春境甯古塔東南

以率賓路節度使遼時爲率賓府置刺史本率賓故  
地太宗天會二年以札蘭

原作耶懶又作阿懶

路都貝勒所居

地瘠遂遷於此以海陵例罷萬戶置節度使因名率

賓路節度使世宗大定十一年以札蘭率賓相去千里既居率賓然不可忘本遂命名親管明安曰札蘭明安承安三年設節度副使西北至上京一千五百七十里東北至呼爾哈一千一百里西南至海蘭一千二百里北至邊界幹罕阿林舊作幹可阿憐千戶二千里恤品河流經建州東南一千五百里入於海金人置恤品路以此爲名

明一統志八十九

謹按金之率賓路渤海之率賓府今之綏芬河也以金史所云四至診之由今綏芬西北至阿勒楚喀東北至三姓西南至海蘭方隅里到一一皆符

率賓又作蘇濱又作速平亦作速頻又作恤品明

統志金人置恤品路以河爲名與今之綏芬音譯亦無一不合知

率賓之爲綏芬確無疑義三省圖說謂府路故基在今雙城子地方又

考史志言札蘭率賓相去千里札蘭原作耶懶又

作阿懶今綏芬河以東千里許入海之水有雅蘭

河耶阿與雅皆同聲字知金之札蘭卽今雅蘭河

地與史志相去千里之云正合亦可以證此說之

不誣至海蘭本在率賓路西南史有明文源流考

乃謂在率賓路東南則誤之甚矣

呼爾哈路今三姓

又呼爾哈路國初置萬戶海陵例罷萬戶乃改置節  
度使承安三年置節度副使西至上京六百三十里  
北至邊界哈喇巴圖舊作合里賓或千戶一千五百里  
又金之封疆東極濟喇敏原作吉里迷烏達噶原作兀之  
境

謹按呼爾哈路蓋以河得名今瑚爾哈河自窩古  
塔下至入混同江處凡六百餘里而路之治所定  
屬三姓者以西至上京六百三十里之文覈以今  
由三姓至阿勒楚喀之道方向里數一一相符故  
也路之北境極於哈喇巴圖千戶凡一千五百里



以地望診之應爲今混同江以北盡索倫河處咸  
豐以前固皆屬於三姓無與於黑龍江也史又言  
金之封疆東極於濟喇敏此卽契丹國志之阿里  
眉國明之乞例迷今爲濟勒彌亦曰彌勒彌分居  
於三姓東北混同江海口兩岸昔時亦轄於三姓  
副都統金之呼爾哈路以東更不設官則東境所  
極亦應統於呼爾哈路如今三姓之比特史無明  
文耳然其東境極於東海濱則固信而有徵也

咸平路

治在今開元縣境其所屬歸  
仁玉山二縣今伊通州境

又歸仁縣遼舊隸通州安遠軍本渤海強師縣遼更

名金因之北有細河

又玉山縣章宗承安三年以穆蘇

舊作馬遠

集平郭林河

之間相去六百餘里之地置貞祐二年四月升爲節  
鎮軍曰鎮安

謹按金史咸平路領府一曰咸平據方輿紀要咸  
平城在鐵嶺東北滿洲源流考謂在英額威遠二  
門之間二說雖異要皆在今開原東府屬縣八惟  
歸仁玉山二縣屬吉林伊通州境考全遼志開原  
北第三站曰歸仁站卽故縣也診其地望應在今  
威遠堡門外二百里左右玉山縣據史文以穆蘇

集平郭林河之間相去六百里之地置考穆書河  
在伊通河之東自呼蘭哈達北流入松花江自開  
原至其地亦尙不出六百里之內則兩縣之地應  
屬吉林無疑又金史列傳咸平有梅赫河雅哈河  
此二河舊皆屬吉林今爲奉天海龍廳地則咸平  
一路其東直抵輝發與上京西南接界矣

泰州

今農安縣西北

又泰州德昌郡節度使遼時本契丹二十部族牧地  
海陵正隆間置德昌郡隸上京大定二十五年罷之  
承安二年復置於長春縣以舊泰州爲金安縣隸焉

北至邊四百里南至懿州八百里東至肇州三百五十里城一堡十九

又長春縣遼長春州韶陽軍天德二年降爲縣隸肇州永安三年來屬有達嚕噶河鴨子河必喀布舊作別里不泉

謹按泰州今爲科爾沁左翼前旗及郭爾羅斯前旗地所屬長春縣爲今吉林農安縣西北境方輿紀要所謂邊人呼爲新泰州者是也東北去今伯都訥城實不足三百五十里史志所云殆據舊泰州言之耳

元爲開元咸平合蘭府碩達勒達等路及肇州地

開元路

元史地理志二開元路古肅慎之地隋唐曰黑水靺鞨唐以其地爲燕州置黑水府東瀕海南界高麗西北與契丹接壤卽金鼻祖之部落也太祖阿古達旣滅遼卽上京設都海陵遷都於燕改爲會府金末其將布希萬努原作蒲鮮萬奴據遼東元初癸巳歲出師伐之生擒萬努師至開元率賓東土悉平開元之名始見於此乙未歲立開元南京二萬戶府治黃龍府至元四年更遼東路總管府二十三年改爲開元路領

咸平府後割咸平為散府俱隸遼東道宣慰司續通志曰

元史志開元路即金會甯府又云開元萬戶治黃龍府考遼黃龍府金改為隆州非會甯也開元西北曰會甯府西曰黃龍府是會甯黃龍與開元相近而非即開元也又滿洲源流考曰開元本金上京境內地元兵至此遂定其地而故上京一帶俱已殘毀因改建開元路非開元即上京也其初寄治黃龍府後徙於今開原縣地明初因以設衛亦非今開原縣即黃龍府也按較此二說元史之得失俱見矣

元一統志開元路南鎮長白之山北浸鯨州之海三

京故國五國故城亦東北一都會也滿洲源流考十三引

謹按開元路據元史地志所言蓋全有今吉林之

地據元統志三京五國云云則由長白山至黑龍

江凡東北濱海之地蓋皆隸於開元惟自元初立

開元萬戶府治黃龍府是移治於今農安城卽已  
非金上京之舊至元四年改遼東路總管府二十  
三年改爲開元路治咸平府則再徙於今開元縣  
地又非元初治黃龍府之舊明初因其地設開原  
衛始改元爲原所轄之地視元初時廣狹迥殊考  
古者每以今之開原視元之開元則失之遠矣

### 咸平府

元史地理志二遼平渤海以其地多險隘建城以居  
流民號咸州金升咸平府領縣六兵亂皆廢元初因  
之隸開元路後復割出隸遼東宣慰司

元一統志遼河從咸平府界流經瀋陽西北達廣寧

路境

按遼河卽赫爾蘇河出奉天園場經赫爾蘇過門入昌圖境與西遼河合南流入奉天開原界

謹按元咸平府治蓋因遼金之舊其疆域亦復相同遼時自咸州東北分界入山谷至粟末江中間所居之女真隸咸州兵馬司與其國往來無禁謂之輝發而金咸平府境有入輝發河之梅赫河又有雅哈河入赫爾蘇河而元時赫爾蘇河亦自咸平府界流入瀋陽界諸水皆在今伊通州境金咸平府屬之玉山縣在穆書集平郭林河之間穆書爲今伊通州境東北之河而元咸平府初隸開元



路開元路初治黃龍府爲今農安縣地去穆書河  
不遠亦應爲咸平府境之所及其東南則行程錄  
云自咸州北行東望大山曰新羅山深處與高麗  
接界而元咸平路東南斜抵鴨綠江亦接高麗據元  
高麗人李齊益齋集契丹金山王子等爲亂元  
將哈真討之時賊在咸州與我比境雞犬相聞等  
語知是疆域無大差殊之徵也

海蘭路

元史地理志二海蘭路碩達勒達

舊作水達達

等路土地

廣闊人民散居元初設軍民萬戶府五撫鎮北邊一  
曰屯一曰呼爾哈一曰烏圖里一曰托果琳一曰布

苦江各有司存分領混同江南北之地其居民皆碩  
達勒達女直人各仍舊俗無市井城郭逐水草爲居  
以射獵爲業故設官牧民隨俗而治有海蘭府碩達  
勒達等各相統攝焉

續通志一百八合蘭府碩達勒達等路金扶餘海蘭  
率璦和囉噶等路及肇隆信三州地也

屯

舊作桃溫

萬戶府

今甯古塔東北七百里

距上都四千

舊訛四十  
據滿洲源

流考  
改正里

呼爾哈萬戶府距上都四千二百里大都三千八百  
里有呼爾哈江並混同江又有海蘭河流入於海接元

時所設呼爾哈路當仍金舊地其轄境  
有海蘭河蓋甯古塔西北之海蘭河也

烏圖哩

舊作幹朵憐源  
流考作鄂多哩萬戶府

托果琳

舊作脫  
幹憐萬戶府

布固江

舊作李苦源  
流考作布呼萬戶府

謹按元海蘭府與金海蘭路異地金海蘭路在長  
白山南有大小海蘭河入噶哈哩河以達圖們江  
故金志云東南至高麗界五百里也元海蘭府路  
治所應在呼爾哈路之海蘭河但海蘭河係入呼  
爾哈河以達混同江史云流入於海則非也元統  
志云自南京而南曰海蘭府又南曰雙城直抵於

高麗之王京覈其疆域似是金之海蘭率賓兩路  
在元爲開元路境非元之海蘭路所及也且元自  
乙未歲立南京萬戶府及至元四年更遼東路此  
後無南京之名不應統志尙仍舊號觀肇州條下  
上京之北曰肇州之文按之元時名稱方位均不  
相合其爲襲用渤海遼金之舊號無可疑者據此  
而謂金元兩朝海蘭路同在一地豈有當乎至其  
所屬軍民萬戶府五今雖半無可稽以史文分領  
混同江南北之地一語斷之知皆當距混同江不  
遠屯爲桃溫二字之切音今混同江北發源屯窩

集之屯河應卽其地呼爾哈路以距大都里數覈之當仍金舊無疑烏圖里疑當爲烏蘇哩江或謂爲鄂多里城其地距混同江千里而遙且已轄於開元與海蘭府亦似遠不相涉通志謂烏蘇哩江之巨川幾爲從古無名之水因以和羅噶路當之考和羅噶卽胡里改也旣譯改作爲呼爾哈定爲牡丹江又易寫爲和羅噶以當烏蘇里金正有一胡里改路固不應如是之遷就而屢易其名也若烏圖里烏蘇哩音譯旣符且近在混同江南與史所云方隅亦合是仍夾滌鄭氏以山川定疆域之

義也布固原作孛苦以音求之應爲黑龍江之魁  
其托果琳則無可考矣

### 肇州

元史地理志二至元三十年以納延故地曰阿巴拉  
呼者產魚以伊斯渾哈喇納蘇奇爾濟蘇三部人居  
之名其城曰肇州

元史

元史成宗紀二元貞元年立肇州屯田萬戶府以遼  
陽行省左丞阿撒領其事

又兵志三肇州屯萬戶府元貞元年以納延布拉噶

齊

原作乃顏不魯古赤  
蒙古語捕貂人也

及打魚碩達勒達等戶於肇

州旁近地開耕

謹按元史云元統志經世大典皆不載此州故附

注廣甯府下考百官志有肇州等處女直千戶所

又史大德二年撥夫餘路

今黑龍江境

蠻軍三百戶屬

肇州可見地與黑龍江鄰又山居新語

元楊瑀

孫子

耕友流奴兒干

今甯古塔以東

孫送至肇州可見與甯古

塔近又陳韶孫傳父流肇州韶孫與俱往道過遼

陽平章塔出留之曰邊地苦寒是亦決不在廣甯

之徵以打魚捕貂言之今廣甯東北無打魚捕貂

處當爲吉林無疑

又按元時疆域寬廣甲於歷代以今東三省之大  
僅設一遼陽省以吉林之大僅設開元合蘭兩路  
伊通州境僅咸平之東偏可謂疎節闊目毫無經  
畫者矣蓋其得之也易而用事者又多色目人狃  
於行帳舊風不復以設治安民爲事迨明而衛所  
設盈二百過與不及適相等耳



